

Opposiziun na, resalvas gea

Las vischnancas dal Partenz decidan l'entschatta da mars per u cunter il Parc Reticon

ANDREAS CADONAU/FMR

■ **Trais pajais, 30 vischnancas, ina surfatscha da passa 1100 kilometers quadrat. L'entschatta da mars decida il suveran da las vischnancas dal Partenz sch'ellas vulan sa participar e realisar in dals pli gronds parcs da la natira da las Alps.** «In project per sviluppar l'economia regiunala.» Uschia circumscriva *Georg Fromm* il project Parc da la natira Reticon. Il project lantschà avant quatter onns sa mova plaunsieu vers la fasa decisiva. Ils set da mars decida il suveran da las diesch vischnancas dal Partenz sch'ellas vulan sa participar al project u betg. *Georg Fromm*, dapi diesch onns mainafatschenta da l'organisasiun regiunala Partenz/Tavau, ha fatg attent ch'il parc da la natira planisà en l'intschess dal Reticon na saja betg da paregliar cun il project Parc Adula. Entaifer il perimenter dal parc na saja betg previs ina zona da coc ed era nagina zona circumdanta cun diversas prescripziuns da sa mover u dad utilizar. «Cun talas premissas n'avess il Parc Reticon naginas schanzas en il Partenz». *Georg Fromm* di che gia las suprastanzas communalas na fissan betg entradas en la materia.

Las infurmaziuns èn en chasa

L'emna passada ha la populaziun da las vischnancas dal Partenz retschavì las infurmaziuns davart il Parc Reticon. Quellas recumondan a la populaziun da dir gea al parc. Schegea ch'ellas enumereschan tar mintga singula vischnanca era las consequenzas finanzialas suenter in gea. Però tenor *Georg Fromm* na stoppian las vischnancas betg quintar cun dapli expensas. Bleras incumbensas



In project sur il cunfin da trais pajais, l'entschatta da mars s'exprima il suveran da las vischnancas dal Partenz sch'el vul sa participar al Parc Reticon u betg.

GRAFICA RTR/CARLA GARTMANN

finanziadas da las vischnancas via il svilup regiunal surpiglia il parc ed ils meds restants possian vegnir duvrads per promover il turissem local. Tuttina propona la suprastanza communal da Grüşch da betg sustegnair il Parc Reticon. La gasetta Südostschweiz dals dus da favrer citescha la missiva communa-

la per mauns da la votaziun. «Nus essan conscients da nossa responsabladad vers il turissem e vulain surpigliar tala era en il futur. Dentant betg en questa furma e grondezza.» In comité cunter il project n'exista dentant betg, *Georg Fromm* ha menziunà ils ulteriurs timuns communal che sustegnian il pro-

ject. Ma il promotur da la regiun Partenz è pertschert ch'i dat resalvas vers il parc. «I dat pretensiuns e temas en las plattafurmas socialas che n'han dentant da far nagut cun la realitad.» *Georg Fromm* ha puntuà ch'i na dettia betg novas prescripziuns e d'in turissem da massa che periclitass la chatscha sajan ins lunsch davent. «Ils fatgs èn sin maisa e tgi che sa fatschenta cun tals vesa co ch' il parc è posiziunà.»

Auter da tshella vart dal cunfin

Desistì han ils promoturs dal Parc Reticon da definir in minimum da vischnancas che ston dir gea per realisar il parc. «Da principi pon era pli paucas vischnancas furmar il parc, l'intschess sto dentant restar intact. Votaziuns communalas en las vischnancas dal Principadi da Liechtenstein e dal Vorarlberg participadas al perimenter dal parc na datti betg. «Là funcziuna quai auter e different.» Las decisiuns èn per gronda part en ils mauns da l'executiva.

Tuts guardan cun atenziun

«Tuttina guardan ins cun atenziun sur il cunfin e sin ils resultats da votaziun da las vischnancas dal Partenz», manegia *Georg Fromm*. Per il Principadi da Liechtenstein è in parc da la natira in novum, ed il stadi austriac promova bain parcs da la natira, dentant pli modest che la Svizra, ha *Georg Fromm* accentuà. El ha regurdà a la promoziun economica regiunala che stoppia far in pass dad in project a l'auter e tar mintgin cumenzar da nov. «Il parc furmass ina plattafurma per realisar projects en differents secturs, per tut quels che vulan ed èn pronti da sa participar.»